




PRATICALINGUA
BASTIA - CORTI - MURIANI



ANTICHITÀ

U 22 di settembre di u 2020

Nome :

Casata :

Puntu generale di storia di l'antichità in Corsica

Ùn si tratterà quì di tutti i populi chì sò ghjunti in Corsica nanzu à i Rumani. Ma mentueremu quantunque stu scrittura chì parla d'una tradizione : Populonia, cità etrusca, saria stata fundata da i Corsi. A ci dice un certu Maurus Servius Honoratus, un grammaticu latinu di u quartu seculu nanzu à Cristu, in u so cummentu di l'Eneida di Virgiliu, publicata circa 20 n.à.C.

À u cantu X, versu 172 dunque, u famosissimu pueta rumanu ci ampara chì a cità di Populonia hà premunitu 600 giovani guerrieri per aiutà l'eroe Enea. È Servius cummentendu stu versu ci spieca :

« Quidam Populonium (...) populum ex insula Corsica in Italiam venisse et condidisse dicunt: alii Populonium Volaterranorum coloniam tradunt. alii Volaterranos Corsis eripuisse Populonium dicunt. »


(Certi dicenu chì (...) un populu hè ghjuntu da Corsica in Italia è hà fundatu Populonia ; d'altri contanu chì Populonia era una culunnia di ghjente di Volterra. D'altri torna dicenu chì i Volterrani anu presu Populonia à i Corsi.)

In l'annu 264 nanzu à Cristu, Corsi è Sardi sò alliati à l'Imperu cartaginese d'Africa. Tandù schiatta una guerra tremenda trà e duie più grande putenze di l'epica : a Republica di Roma è Cartagine. Roma hè una putenza terrana è pulitica, Cartagine una putenza cummerciale è marittima. Sta guerra zinga focu à tuttu u punente mediterraniu. Alalia hè presa è brusgiata da cima à fundu da i Rumani in l'annu 259 n. à C. In fatta fine vince Roma.

A Corsica rumana

111 nanzi à C / 476 dopu à C

- Città
- ▣ Cavi di petra
- Stradi marittimi
- ⚓ Marina rumana
- 🌲 Furesta
- 🌱 Zona agricola



Lucius Cornelius Scipione

Lucius Cornelius Scipione, era generale è omu di Statu rumanu di a granda famiglia di i Scipì, branca di a ghjente Cornelia.



U babbu era Cunsulu (Lucius Cornelius Scipione Barbatus) è u diventa ancu ellu in u 259 nanzu à Cristu. Ghjè ellu chì, appena numinatu, conquista à a Corsica è à a Sardegna, mandatu da u Senatu rumanu cù una flotta tamantona. L'invasu di a Corsica era statu decisu cinqui anni nanzu, mentre a prima guerra punica.

Dopu d'esse statu fattu Cònsulu, piglia Alalia di notte (tandu popolata da Cartaginesi, Grechi è Etruschi à bulegghju) è ne face l'Aleria rumana. L'annu dopu, hè fattu Censore.

Hè scrittu nantu à a so tomba in Roma :

Hunc unum plurimi consentiunt Romae

bonorum optimum fuisse virum

Lucium Scipionem. Filius Barbati,

Consul, Censor, Aedilis hic fuit.

Hic cepit Corsicam Aleriamque urbem

dedit tempestatibus aedem merito.

(In Roma, parechji accertanu chì st'omu, Lucius Scipione, hè statu u migliore trà i boni citatini. Figliolu di Barbatus, fù cunsulu, censore è edile. Hà pigliatu a Corsica è a cità d'Aleria. Cunsacrò un tempiu à e tempeste in ritornu.)

Finita sta prima guerra chjamata "punica", schiatta in Africa una rivolta di i mercenarii cartaginesi contr'à a cità punica. A republica rumana ne prufitta per impatrunisciesi d'Alalia in Corsica è di e puseSSIONE puniche in Sardegna in u 238 n. à C.

Da tandu principia a guerra di cunquista di l'Isula sana da i Rumani. I Corsi aspettanu i Rumani in i passaghji, in e zenne è e ruine per assaltàli, ma i cunfronti si passanu dinò in piaghja.

Ci sò parechje stonde in stu cunflittu :

- In u 233 n. à C., u rumanu Glisea face a pace cù l'isulani ma u trattatu hè ricasatu da u sinatu rumanu è Glisea hè mandatu à i Corsi quant'è prigiuneru;
- In u 231 n. à C., e legione di Caius Papirius Maso piglianu a suprana à a battaglia di u Campu di e Morte (Fium'orbu d'oghje) ;
- In u 231 n. à C., facenu di a Corsica è di a Sardegna una pruvincia unica sott'à u cummandu militare d'un Pretore. Saranu spiccate e duie isule sott'à Augustu, in l'annu 6.

E rivolte contru à i Rumani sò parechje : 191 nanzu à Cristu, 2 000 isulani sò tombi ; 172 nanzu à Cristu, 7 000 morti è 1 700 prighjuneri mandati in Roma. Di più, à a Corsica li tocca à pagà un tribbutu di centu tonne di cera ! A cunquista di l'isula finisce in u 111 nanzu à C. cù l'ultima rivolta cunnisciuta.

A carta di Ptulemeu, à u ll'u seculu, conta 31 cità (17 nantu à a costa è 14 à l'internu) è parla di 12 populi chì campanu ind'è i borghi, vale à dì senza drittu di stabbilisciesi in cità.

A rumanizzazione si stende partendu da i porti impurtenti : Aleria, Mariana, Aiacciu, Sagona o Calvi. U paisaghju cambia cù e culture di a vigna, di l'alivu è di u granu fatte à l'usu rumanu. Certi anziani di e legione sò arrughjunati nant'à e terre di Mariana (da Marius) o d'Aleria (da Silla). A muneta è a lingua latina piglianu a suprana nant'à i vechji usi corsi fendu di l'isulani Corsi-Rumani.

A Corsica prудuce tandu :

- Legnu da fà battelli (tavule è maghji di lariciu)
- Rasgina è pece da tuppà i battelli
- Suvaru adupratu per l'elmi, i scudi, i tappi d'anfuro, e rete per a pesca (una scrizione in Aleria ammenta « 15 cità sottumesse à l'impositu di u suvaru »)
- Cunchiglie (l'ostriche di u stagnu d'Urbinu eranu aperte cù un cugnu quatratu di ferru chì s'hà lasciatu e so tracce nant'à a cunchiglia di sopra. Sò cusì l'ostrice trove ammansate à mezu à i terragli rumani di Piantarella. Si pensa chì a parte di sottu cù l'animale era messa in salamoghja eppò mandata in Roma).
- Pesci seccati ; granu ; cughjame ; cera ; mele ; oliu ; vinu.

Parti è più di sti prudutti sò mandati in Roma è certi sò belli apprezzati nant'à i tavulini di i patriziani rumani (nobuli).

- in u 176 n. à C., Corsi è Sardi sò scunfitti da Tiberius Gracchus (15 000 morti !) ;

- in lu 173 n. à C., Claudius Cicerius vince i Corsi in una battaglia ch'è fece 7 000 morti è 1 700 prigiuneri.

L'Isula si spupuleghja per via di tutti ste guerre, l'ultima rivolta hè ammattata da u prefettu rumanu Metellu in u 111 n. à C. : ghjè a fine di a cunquista rumana di l'Isula è ci hè vulsutu circa 150 anni !

Seneca è a so torra

A torra di Seneca hè una torra in capicorsu. Hè situata annantu à a cumuna di Luri, sopra à a bocca di Santa Lucia. Hè stata custruita à u XVesimu seculu da a famiglia da Mare. Seneca, u filosofu è puliticante rumanu, ci saria statu durante u so esiliu in Corsica da u 41 à u 49. L'esiliu di Seneca finì quandu Agrippina, a moglie di l'imperatore Claudiu, riescì à ottene u so ritornu da l'esiliu è u scelsi com'è tutore di u so figiolu di prima lettu, u futuru imperatore Nerone. Ma issa passata di u sughjornu di Seneca in a torra ferma incerta è più probabilmente, Seneca serà statu in Mariana o in Aleria.



Ellu scrisse parechji affari nantu à a Corsica. D'una certa manera, micca sempre belli ricordi di u so esiliu :

« A sorte mi hà lampatu in un locu induve l'alloghju u più largu hè un pagliaghju [...] ci serà qualcosa di più goffu ch'à stu locu ? [...] Terra orribile induve ùn si vede ch'à diserti dapertuttu [...] Qui omu ùn trova pane per stantà a so vita, nè acqua per attagnà a sete, nè fucarone per a so scera... »

Scrive dinù : « Vindicàsi hè a prima lege di i Corsi, a seconda hè di campà d'arrubecciu, a terza hè d'ingannà, a quarta hè negà i dii ».

Ma quand'ellu vulterà in Roma, scriverà dinù : « Eru bellu più felice in a mo ritirata sulitaria, induve u mare di Corsica mi cinghja da u so borru... Incù meraviglia fighjulava u cele, capidopera di a natura... È a corsa in armunia di l'astri, u pisà è u calà di u sole. È u splendore spampillante di a volta celinca. »

Strabone

In u so libru « *Geografia* », tra u 21 è u 23 dopu à Cristu, scrive : « Kurnos, chjamata Korsika da i Rumani, offre solu un allogghju disgraziatu, perchè hè assai scuscesa è per a maiò parte completamente inaccessibile, à tal' puntu ch' i nativi ch' tenenu e creste è campanu d'arrubecciu, sò peghji ch' à e bestie salvatiche. Quandu i generali Rumani facenu una incursione è cascanu nantu à una furtificazione, riportanu una grande quantità di schiavi è allora omu pò vede da vicinu a strana fisionomia di st'omi salvatichi, cum'è e bestie di i boschi, o baulli cum'è e vacche, ch' ùn supportanu micca di campà in schiavitù, o ch' se ùn si lascianu more, stumacanu i so maestri ch' l'anu compri cù a so apatia è insensibilità, finu à ch' i maestri si lamentanu di i pochi soldi ch' li anu custatu (...)

Strabone dà una descrizione di e coste di Corsica da u Sud à u Nord :

Descrizione di a parte occidentale :

Cità di Palla

Portu Siracusu

Cità di Rhoubra

Prumontoriu Graniakon

Cità d'Alista

Portu Philonios

Descrizione di a parte orientale :

Bocca di u fiume sacru

Culunia d'Aleria

Bocca di u fiume Rhotanos

Portu d'Artemis

Cità di Mariana

Prumontoriu Ouagon

Cità di Mantinon

Cità di Klunion

Parechje scale di i Goti in Corsica sò insignate da scritti antichi versu l'annu 412, ma pochi rinsignamenti veninu par spiegà l'epica, quandu sti barbari fecinu spedizione contru à Roma à a fine di u Vtu seculu.

A venuta di i Vandali hè cunnosciuta di più. Dopu à u 392 è a morti di Valintianu, i Vandali piglianu pusessu di l'isula. Si sà ch' trà u 477 è u 484, l'ariani ci esilianu una mansa di veschi africani catolichi cundannati à taglià u legnu da fà ne vasceddi.


A carta di Ptulemeu, à u ll' seculu, conta 31 cità (17 nantu à a costa è 14 à l'internu) è parla di 12 populi chì campanu indè i borghi, vale à dì senza drittu di stabilisciesi in cità.



Secundu Pliniu, i Rumani dividenu l'isula in 33 *civitate*, una *civitas* essendu una cumuna straniera: una cità, una cumuna o una culonia, era cumposta, fora di a cità quandu ci era, di un territoriu di più o menu ampiezza. Questu territoriu cuntene *vici* (borghi), *pagi* (paesi), *castella* o *oppida* (piccule furtificazione), grande pruprietà è tenute, *fundi*, *villæ* è *prædia*. Sta ultima espressione hè stata priservata, sottu u nome di presa, i Corsi davanu stu nome à a parte cultivata di u territoriu invece di a parte riservata à passaghju liberu.

Trà e cità, cità o culoni indicati da Plinio, pudemu ammentà Mantinum (Bastia), Urcinium (Ajaccio), Palla (Bonifacio), Calvi, San Fiurenzù, Centurium (Centuri), Ropicum (L'Île-Rousse), Venicium (Venaco), Pauca (Propriano), Mora (Bocognano), Tarrabinorum Vicus (Vico), Talcini (Corte), Portus Syracusanus (Porto-Vecchio), Tamina (Macinaggio), Lurinum (Luri), Opinum (Chiatria), Nebbio

rovinata, Mariana rovinata, Pino, Ponte d'Arco, Canarie, Ostricone, Aleria rovinata, Marianum Promontorium (Casa Barbarica), Sartene, Balagne, Girolata ...



U SITU D'ALERIA



In fine...

Dopu una nova sbarcata di i Goti, veneranu à stabbiliscesi i Bizantini chì urganizeranu l'amministrazione isulana, purtendu u paese versu u Medievu.

L'isula diventa prupietà di a Chjesa. E cità impurtente sò Marinianis (Mariana), Colonia Iulii (Aleria), Turrinum (Nebbiu supranu ?), Coenicum (Cinarcia, Sagona ?) è Agiation (vechju Aghjacciu). Si pò vede quì a nascita di 5 viscuvati, di cinque lochi di primura per l'ecunomia, l'amministrazione, a pulitica è a religione. Da quì si spargherà u cristianisimu, partendu da a costa versu e serre.

I scritti di u Papa Gregoriu u Maiò (590 – 604), chì trattanu di l'urrganizazione di a Chjesa in Corsica, ci insegnanu chì, nant'à i cinque viscuvati (Mariana, Aleria, Sagona, Opinon è Figari), dui ùn sò pruvisti di vescu. Si leghje dinò ch'ellii sò pochi fattivi i preti è chì u paganisimu hè bellu presente.

E sole testimonienze di e credenze pagane sò scritte da stu Papa Grigoriu chì chjama in Corsica à a cristianizazione di quelli chi si sò vultati versu u cultu di l'idole « per lasciacorre o necessità », dumanda d'un onorà micca l'idole di legnu o di petra, è ancu una crescita di i battesimi cù una conversione di a ghjente « ancu cù a paura ».


L'isula lasciata da Bisanza passa sott'à a duminazione lunghibarda.

A vostra cuntribuzione

1 - Lucius Cornelius Scipione hà messu a cultura corsa pre latina à caternu. Cosa li puderiamu mandà cum'è messaghju, à stu generale ?

2 - Site un suldatu rumanu di a prima legione mandata per cunquistà a Corsica. Scrivite u vostru parè nantu à a vita di l'omi di quì.

3 – Piazzemu i lochi di a carta di Tuemeu nantu à a sta carta muderna di a Corsica :



4 – Cosa ci ferma oghje, da i tempi rumani ?

Referenze è risorse

- A Piazzetta – Roma, cità corse (10 di maghju di u 2015)
- Denis Luciani - Storia di Corsica illustrata – CRDP di Corsica – 2014
- Olivier Jehasse - Corsica Classica – 2010
- https://www.educorsica.fr/storia_di_a_corsica/